



EL AYUDA QUE TA SALE NA CIELO

Arreglao por Watson Goodman

Libre — Hende para Vende

EL AYUDA QUE TA SALE NA CIELO

“El Ayuda Que Ta Sale Na Cielo” es un coleccion de versiculos de Escritura que tiene relacion na muchas partes del Biblia. Ta cree yo que ci mas mejor comentario del Escritura es el mismo Biblia.

El palabra del Dios que ta “sale na cielo” tiene grande ayuda con el maga corazon quien tiene hambre y siquia na cosas justo. Cuando un persona ya arripinti, ya desaleja le na maga pecado, ya invita le con el Señor Jesucristo na su corazon, y ta cree le con todo su corazon con el Señor Jesucristo como Salvador, el Señor ay manifesta di Suyo mismo presencia con ele y dale el di Suyo alegria y paz con el creyente. Ya experiencia yo este del año 1937 y nuay gayot yo quebra este bonito relacion que tiene yo con ci Señor desde aquel tiempo. Ta pidi yo con ustedes que rindi tamen di ustedes vida con Ele, y acepta con ele como Salvador y Señor ahora mismo, si nuay pa ustedes hace ese. —Watson Goodman (1920-2002)

Selected scriptures taken from Chavacano New Testament Copyright © 1981 by Biblica, Inc.® Used by Permission of Biblica, Inc.® All rights reserved worldwide.

EL AMOR DE DIOS

Pero Dios ya dale mira si paquemodo gayot ele ta ama canaton, cay cuando puro pa kita pecador si Jesucristo ya muri na lugar di aton. —Roma 5:8

Ya llega ya el bisperas del Celebracion del Passover y ya sabe si Jesus que corto ya lang el di suyo tiempo aqui na mundo, y hende mas tarda ay volve ya le alla con su Padre Celestial. Tiene le grande amor para con aquellos quien ta tene fe con ele aqui na mundo, y ahora ta demostra ya le si paquilaya de grande el di suyo amor para canila. —San Juan 13:1

“Un gente quien ya dale su vida

na lugar del di suyo maga amigo, ele ya dale mira el mas grande amor de todo.” —San Juan 15:13

Y ta sale tamen con Jesucristo, quien el fiel testigo. Ele amo el quien ya muri y ele el primero con quien Dios ya hace resucita del muerte y quien hende na ay muri. Ele amo tamen el quien ta reina con todo el maga otro rey na mundo. —Revelacion 1:5

Por causa del grande amor de Dios con el maga gente, ya manda le con el di suyo unico Hijo aqui na mundo, para aquellos quien ay tene fe con ele hende ay perde el di

ila alma, sino ay tene vida eterna.
—San Juan 3:16

Pero aquellos quien hende ta a-

ma con otros, no conoce pa sila
con Dios, cay el verdadero amor
ta sale lang con ele.

—1 San Juan 4:8

EL NATURALEZA DIVINO DE JESUCRISTO

Y nuay quien puede nega si pa-
quemodo de bien grande y bien
hondo el sentido del di aton creen-
cia acerca di Jesucristo: “Ele ya
nace con cuerpo de gente, y el
Espiritu Santo ya dale mira que
ele justo. El maga angeles ya mira
tamen con ele. Tiene del maga
gente ya predica acerca di suyo na
maga nacion, ya cree con ele el
maga gente na mundo, y despues

ya subi le na cielo.”

—1 Timoteo 3:16

Antes pa del creacion del mun-
do, ta existi ya el quien ta llama el
Palabra. (Este Palabra amo el
quien ta expresa todo el pensa-
miento de Dios.) Este Palabra jun-
to con Dios y igual tamen con ele.
Aquel Palabra ya queda un carne
humano y ya vivi le junto cana-
ton, y tiene le gran compasion y el

entero vida di suyo verdad gayot. Y ya mira came el di suyo poder que ya recibi le cay ele el unico Hijo del Padre Celestial.

—San Juan 1:1 y 14

Ya contesta si Jesus con ele, “Felipe, porque man no sabe pa tu si quien gayot yo, siendo ya tarda ya gayot yo junto con ustedes? Si quien ya mira ya conmigo, como si fuera ya mira ya tamen ele con mi Padre. Porque man tu ta habla pa ansina, ‘Dale canamon mira con el

di uste Padre’? Felipe, hende ba tu ta cree que yo junto con mi Padre, y mi Padre junto conmigo, como uno lang came siempre?”

—San Juan 14:9, 10a

Todo ese ya sucede para cumpli el cosa Dios ya habla desde antes pa por medio di Isaias, uno del maga profeta, quien ya habla, “Un virgen ay queda preñada y ay pari un bata hombre, y ay pone su nombre Emanuel!” Quiere decir “el Dios junto canaton.”

—San Mateo 1:22, 23

SI JESUS, EL HIJO DE DIOS

El angel ya contesta con ele, “El Espiritu Santo ay entra contigo y

Dios ay controla contigo por medio del di suyo poder, y el re-

sulta de ese, el di tuyo anak ay queda igual con Dios y ay llama con ele el Hijo de Dios.”

—San Lucas 1:35

Si quien ta admiti que si Jesucristo amo el Hijo de Dios, entonces el Dios ta vivi na su corazon y ele tamen ta vivi unido con Dios.

—1 San Juan 4:15

Masquin un gente si Jesucristo, pero tiene tamen le todo el perfeccion del naturaleza de Dios.

—Colosas 2:9

“Entonces porque man ustedes ta habla que ta insulta yo con Dios cuando ya habla yo que yo el Hijo de Dios? Paquemodo man yo ta insulta con Dios siendo ele amo

ya escoje conmigo y ya manda conmigo aqui na mundo? Si hende yo ta hace el trabajo del di mio Padre, no necesita ustedes cree el cosa ta habla yo con ustedes.”

—San Juan 10:36, 37

Y un voz ta sale na celaje ta habla, “Este amo el di mio Hijo con quien ta ama gayot yo, y con ele bien alegre tamen yo. Pone gayot atencion con ele!”

—San Mateo 17:5b

Y despues ya grita sila con Jesus, “Uste, el Hijo de Dios, cosa man uste quiere hace canamon? Ya vene ba uste para castiga canamon antes del ultimo jugada?”

—San Mateo 8:29

SI JESUS TA HABLA CANATON QUIEN ELE

Ya habla si Jesus canila, “Ustedes de aqui abajo, quiere decir de este mundo, pero el di mio mismo lugar alla arriba na cielo, hende gayot aqui na mundo.” . . . Ya contesta si Jesus, “Ta habla gayot yo claro con ustedes, antes de nacer si Abraham, existido ya yo.” —San Juan 8:23 y 58

Despues ya habla si Jesus con ele, “Yo ya el Cristo quien ahora ta conversa con uste.”

—San Juan 4:26

Despues ya habla si Jesus canila, “Yo amo el sustancia que ta dale vida eterna. Si quien ay vene conmigo, hende nunca ay

man con hambre, y si quien ay tene fe conmigo, hende tamen nunca ay tene sequia.”

—San Juan 6:35

Mientras taqui pa yo na mundo, yo amo el luz que ta ilumina el entendimiento del maga gente na mundo.”

—San Juan 9:5

Poreso si Jesus ya esplica canila el di suyo cuento, y ya habla le, “Deverasan gayot que yo como el puerta del turil donde ta pasa el maga carnero.”

—San Juan 10:7

Ya habla si Jesus con ele, “Martha, yo amo el quien ta hace levanta con el maga muerto, y yo amo tamen ta dale vida. Si quien ay

cree y obedece conmigo, masquin
ya muri ya le, ay vivi le junto con

Dios hasta para cuando.”

—San Juan 11:25

CUANTOS MILAGRO YA HACE SI JESUS

Despues ya manda le senta con el manada de gente na zacate, y ya saca le el cinco bilug de pan y el dos bilug de pescao, y ya alsa su cara na cielo y ya dale gracias por el comida. Despues ya hace le pedaso pedaso con el pan y con el pescao. Y ya dale ese con el maga dicipulo para distribui sila ese con el manada de gente. Todo el maga gente ya puede come hasta ya man busuk gayot. Despues el maga dicipulo ya puede pa recoje doce alat lleno de maga pedaso pe-

daso que ya sobra. Tiene cinco mil de gente quien ya puede come puera el maga mujer y el maga bata.

—San Mateo 14:19-21

Ya habla si Simon con Jesus, “Señor, entero noche ya lang gane came ta pesca pero nuay gane kujida. Pero si ta habla man uste conmigo ansina ay tira yo el rede donde uste ta manda.” Despues ya tira sila el rede na hondura, y deverasan ya cuji sila un manada de pescao y cerca ya rompe el rede.

—San Lucas 5:5, 6

Aquel mismo hora tiene dos gente bulak sentao na canto del camino, y cuando ya oi ya sila que ta pasa si Jesus, ta grita sila con Jesus, "Hijo di David, tene lastima canamon!" ... Entonces si Jesus ... ya habla, "Cosa man ustedes quiere que hace yo para con ustedes?" Ya contesta sila con

ele, "Por favor, Señor, manda dao canamon mira otra vez." Y si Jesus ya tene lastima canila, y ya pone le el disuyo maga mano na di ila maga ojos, y enseguidas ya puede sila mira. Despues ya sigui sila dayun con ele.

—San Mateo 20:30 y 32-34

SI JESUCRISTO EL CREADOR Y EL SEÑOR

Cay por medio di Jesucristo, Dios ya crea todo el maga cosas na cielo, y na mundo, y el maga cosas que ta puede kita mira, y el maga cosas que no puede kita mira. Esos ta inclui el mundo del maga angeles y el di ila maga

gobernador y maga autoridad y sila quien tiene poder. Dios ya crea con todo esos pati el entero creacion por medio di Jesucristo y para dale honor con Jesuscristo.

—Colosas 1:16

Y por medio de ese Palabra,

Dios ya crea todo las cosas. Nuay nada ya queda creao si hende por medio de aquel Palabra.

—San Juan 1:3

... Durante este maga tiempo ta manda le sabe canaton el di suyo maga palabra por medio del di suyo Hijo. Y por medio del di suyo Hijo tamen, Dios ya crea todo las cosas na mundo y na cielo. Y ya nombra le con ese Hijo heredero de todo.

—Hebreo 1:2

“Todo el maga gente de Israel, necesita sabe que Dios ya nombra con Jesus el di ustedes Señor y Cristo, y aquel si Jesus amo con quien ustedes ya clava na cruz.”

—Maga Trabajo 2:36

Poreso el Cristo ya muri y ya resucita para controla con el maga gente quien ta vivi pa y con esos tamen quien ya muri ya.

—Roma 14:9

JESUCRISTO ES EL JUEZ DE TODO

Entonces nuay ni uno di ustedes debe critica con el di ustedes maga hermano na fe ni desprecia canila, cay un dia todo kita ay anda

na presencia de Dios para ay juga le canaton.

—Roma 14:10

Ahora, ta dale yo contigo cargo na presencia de Dios y di Jesu-

cristo. Al llegar ole si Jesucristo para reina, ay jusga le con el maga gente vivo y con el maga muerto.

—2 Timoteo 4:1

“Al llegar el Hijo del Hombre otra vez ay vene le como el Rey del cielo, con grande poder, y todo el di suyo maga angeles ay man junto con ele. Y ele ay senta na su trono para jusga. Despues todo el maga gente del mundo ay para na di suyo presencia y ay separa le con el maga gente, como el pastor

ta separa el maga carnero con el maga cabrito.”

—San Mateo 25:31, 32

Entonces Dios ay considera todo ese acerca di ila al llegar el dia ay jusga le por medio di Jesucristo, y ay hace le claro el maga secreto que ta esconde el maga gente na di ila maga corazon. Y ay jusga le conforme el enseñanza del Buen Noticia acerca di Jesucristo que yo ta proclama.

—Roma 2:16

EL REDENCION POR CRISTO SOLAMENTE

Ya contesta si Jesus con ele, “Yo amo el camino para con Dios, yo tamen amo el principio del ver-

dad, y yo amo el quien ta dale vida con el maga gente. Nuay ningunos quien ay puede llega con el di mio

Padre Celestial si hende ele ay sigui conmigo, quien el camino para con ele.” —San Juan 14:6

“Yo amo el puerta. Si quien ay entra por medio de este puerta nuay con ele cosa ay pasa, y ele ay queda bajo el di mio proteccion como el carnero puede man entra y sale para busca su comida.”

—San Juan 10:9

“Poreso ya habla yo que ustedes ay muri sin perdon del pecado. Y si hende gayot ustedes ay cree que yo amo gayot aquel que ya habla yo con ustedes, al murir ustedes hende gayot ay queda perdonao el di ustedes pecado.”

—San Juan 8:24

Pero por causa del gran favor de Dios, ta puede le considera canila como si fuera nuay sila pecado por medio del muerte di Jesucristo, quien ya rescata canaton.

—Roma 3:24

Entonces puede le salva hasts para cuando con todo el maga gente quien ta atraca con Dios por medio di suyo. Y puede le suplica pirmi na lugar del maga gente con Dios cay vivo pa le hasta para cuando.

—Hebreo 7:25

“Nuay otro persona na entero mundo con quien Dios ya nombra para salva canaton, cay el salvacion ta sale lang con ese.”

—Maga Trabajo 4:12

EL REDENCION POR CRISTO SOLAMENTE

Dios ta lleva con ustedes na union con Jesucristo, y ele amo el di aton sabiduria que Dios ta dale canaton. Dios ta considera tamen canaton como si fuera nuay kita pecado, por medio di Jesucristo. Ya libra y ya separa le canaton del poder de pecado para queda kita di suyo lang solo, y todo este ya hace le por medio de su muerte na cruz que ta dale vida eterna.

—1 Corinto 1:30

Si Jesucristo ya otorga entrega con ele mismo para muri, para rescata canaton maga gente, y para libra canaton de todo maldad, y para puede hace canaton maga

buen gente quien ta queda di suyo lang gayot, y quien quiere quiere gayot hace maga cosas bueno.

—Tito 2:14

Dios ya salva ya canaton na poder del oscuridad, quiere decir el poder di Satanás y del pecado. Y ya lleva le canaton na reino del di suyo estimao Hijo, si Jesucristo. Cay si Jesucristo gane ya rescata canaton, poneso Dios ya perdona el di aton maga pecado por causa di suyo.

—Colosas 1:13, 14

“El Hijo del Hombre ya vene para busca y salva con el maga gente quien no conoce con Dios.”

—San Lucas 19:10

Cay uste amo con quien ya mata el maga gente, y por medio del di uste sangre que ya derrama uste na cruz, ya rescata uste con

todo el maga gente quien ya sale de diferente raza, lenguaje, y nacion para queda sila el maga gente de Dios.” —Revelacion 5:9b

EL PERDON POR MEDIO DEL SANGRE DE CRISTO

Y por causa del muerte di Jesucristo, Dios ta considera canaton como si fuera nuay kita pecado, entonces asegurao kita que ay queda kita salvao por medio di Jesucristo para hende ay alcanza canaton el gran rabia de Dios.

—Roma 5:9

Por medio del muerte di Jesucristo, Dios ya salva canaton para hende kita ay recibi el castigo del di aton maga pecado, cay ya per-

dona le canaton. Ya hace le ese por causa del abundancia del di suyo gran favor. —Efeso 1:7

“Cay este el di mio sangre y por medio del di mio sangre que ay derrama yo, mucho maga gente ay tene un nuevo manera para ay puede sila queda perdonao.”

—San Mateo 26:28

Ustedes sabe ya que Dios ya rescata con ustedes del vida que no vale nada que ya hereda uste-

des con el di ustedes maga tatarabuelo. Nuay le rescata con cosas que ay perde valor como el oro y el plata, sino ya rescata le con ustedes con el bien precioso muerte di Jesucristo, como ele el sacrificio ofrecido, y como si fuera le un carnero que nuay defecto y nuay mancha, perfecto gayot para dale con Dios. —1 San Pedro 1:18, 19

Dios ta esta siempre na lugar de claridad, entonces si ta vivi kita na di suyo luz puede kita tene buen relacion con uno y otro, y el sangre di Jesucristo, el di suyo Hi-

jo, que ya derrama le cuando ya muri, ta continua limpia todo el di aton maga pecado. —1 San Juan 1:7

Si deverasan gayot ese acerca del sangre de animal, mas mejor el efecto del sangre di Jesucristo, quien ya ofrece con Dios el di suyo mismo cuerpo por medio del Espiritu eterna como un ofrenda perfecto. Y aquel sangre di suyo amo el mas efectivo para hace limpio el di aton conciencia para hende kita ay hace el trabajo de nuay sirve, sino ay sirvi kita con Dios quien hende nunca ay muri.

—Hebreo 9:14

SALVACION POR FE EN CRISTO

Cay por causa de ese gran favor de Dios, tiene ya ustedes salvacion por medio de fe con Jesucristo. Ese salvacion amo el regalo de Dios, y hende ustedes ta puede tene con ese por causa de masquin cosa buen trabajo o accion que ustedes ta puede hace. No puede ustedes tene salvacion por causa del maga buen trabajo que ta hace ustedes, poneso nuay ningunos ay puede tene orgullo de tener salvacion por su mismo fuerza. —Efeso 2:8, 9

Ahora Dios ta considera canaton como si fuera nuay kita pecado cay ta tene kita fe con Jesu-

cristo el di aton Señor, y por causa de ese fe puede kita tene buen relacion con Dios. —Roma 5:1

...“Tene fe con el Señor Jesucristo y ay queda tu salvao pati todo el quien ta esta na di tuyo casa.” —Maga Trabajo 16:31

Cay todo el maga anak de Dios ta puede gana el maldad del mundo, y si tiene gayot fe con Jesucristo, ansina ta puede kita gana victoria contra el maldad del mundo. —1 San Juan 5:4

Poneso ya pregunta sila con ele, “Cosa man came necesita hace para puede came trabaja el maga

trabajo que Dios quiere?” Ya contesta si Jesus, “El trabajo que Dios quiere para hace ustedes amo que tene fe con el quien Dios ya manda aqui na mundo.”

—San Juan 6:28, 29

Pero todo el escribido aqui amo para puede ustedes cree que si Jesus amo el Cristo, el Hijo de Dios, para por medio de ese fe con ele ay tene ustedes vida eterna.

—San Juan 20:31

EL MISERICORDIA DE DIOS

Y el Hijo del Hombre ya vene para salva con el maga gente estrabiao de camino para con Dios. “Cosa man el di ustedes opinion acerca de este historia que ay habla yo? Si un gente tiene cien cabeza de carnero y uno de esos ya estrabia de camino, ay deja le dayun el noventa y nueve carnero na savana y ay anda anay busca con

el carnero estrabiao, hende ba? Ta habla gayot yo deverasan, si ay encontra le con ese, ay queda gayot le bien alegre por causa de ese carnero estaba perdido que con el noventa y nueve carnero que nuay queda estrabiao.

—San Mateo 18:11-13

Entonces tiene kita confianza para atraca na trono de Dios para

ay experiencia el di suyo lastima y para ay recibi tamen kita el di suyo gran favor para ayuda canaton na hora del di aton necesidad.

—Hebreo 4:16

Debe kita dale gracias y alabanza con Dios, el Padre del di aton Señor Jesucristo! Por causa del di suyo grande lastima, ya dale le canaton nuevo vida por medio del resurreccion di Jesucristo. Ese resurreccion ta dale tamen canaton un vida de esperanza que ay tene kita el vida eterna, igual con Jesu-

cristo quien ya resucita.

—1 San Pedro 1:3

Entonces, ya salva le canaton. Hende por causa del maga buen accion que ya hace kita, sino por el di suyo lastima lang ya salva le canaton. Ya salva tamen ele canaton por medio del trabajo del Espiritu Santo, cay ya limpia le na di aton vida el maga maldad y pecado. Ahora tiene ya kita nuevo vida como si fuera ya nace ole, cay ele ya dale canaton nuevo corazon y pensamiento.

—Tito 3:5

EL INVITO DE DIOS PARA CANATON

Entonces, maga mensajero came quien ta representa con

Jesucristo aqui na mundo. Ahora, como si fuera Dios mimso ta pidi

favor con el maga gente, y ta usa le el di amon maga boca para invita con ustedes man amigo de Dios. —2 Corinto 5:20

El Espiritu de Dios y el Novio ta habla, “Vene!” Y todo el quien ta puede oi este, debe habla tamen, “Vene!” Si quien con sequia, vene; y si quien quiere toma, puede sila toma sin pago el agua que ta dale vida. —Revelacion 22:17

Dios ya salva y ya escoje canaton para queda kita el di suyo maga gente. Nuay le hace este por causa del maga buen trabajo y accion que ya hace kita, sino por causa del di suyo intencion y del di suyo gran favor para canaton.

Ya dale le este gran favor por medio di Jesucristo, antes pa gayot del creacion del mundo.

—2 Timoteo 1:9

El ultimo dia del Celebracion del maga Payak amo gale el mas importante dia. Cuando ya llega ese dia, si Jesus ya levanta alla na presencia del maga gente y ya anuncia gayot, “Si tiene di ustedes con sequia, vene lang conmigo y toma.” —San Juan 7:37

Pero cuando ya sabe si Jesus el cosa sila ta hace, ya rabia gayot le, y ya habla con el maga dicipulo, “No sangga canila de llevar el di ila maga bata aqui conmigo, cay el Reino de Dios para del

gente quien ta confia lang con Dios como el bata diutay ta confia con su tata.” —San Marcos 10:14

“Vene aqui conmigo, todo el

quien ta sufri maga pesao tormento, y yo amo el quien ay manda con ustedes queda contento.”

—San Mateo 11:28

HENDE TODO'L GENTE ANAK DE DIOS

Puede kita sabe si quien el maga anak de Dios y si quien el maga anak di Satanas. Todo aquellos quien ta hace cosas malo y hende ta ama tamen con el di ila hermano creyente, hende sila maga anak de Dios. —1 San Juan 3:10

Aquellos quien guiao del Espiritu de Dios amo gayot ahora el maga anak de Dios, cay Dios nuay dale con ustedes el Espiritu Santo para queda ustedes el maga esclava

vo del miedo, sino ya recibí ustedes el Espiritu Santo quien ta manda con ustedes queda como el maga anak de Dios, poneso tiene kita el derecho para llama con Dios “Padre di amon!”

—Roma 8:14, 15

Para ustedes como maga anak de Dios ay queda nuay mancha de pecado aqui na mundo lleno de gente malo. Debe ustedes dale claridad entre el maga pecador,

como el maga estrellas ta brilla na
cielo oscuro. —Filipos 2:15

Y Dios el Señor ya habla tamen
na Sagrada Escritura: “Poreso
ustedes maga creyente, desaleja
con el maga hende-creyente,
separa y anda lejos canila. No
ledia con el maga cosas prohibido,
como el di ila maga idolo, y en-
tonces yo ay recibí con ustedes.

Yo ay queda el di ustedes Dios
Padre, y ustedes ay queda el di
mio maga anak, hombre y mujer.
El Dios todo poderoso amo el
quien ya habla ansina.”

—2 Corinto 6:17, 18

Pero tiene di ila ya recibí y ya
cree tamen con ele, y con esos
maga gente ya dale le el derecho
para queda el maga anak de Dios.
—San Juan 1:12

COSA EL DIOS TA HABLA ACERCA DEL TOMADA FUERTE

“Tene ustedes cuidao, no queda
tragon o queda borracho, y no
ocupa el pensamiento para man
lingasa que manera ay vivi este

vida, cay si ta hace ustedes ansina
derrepente lang ay llega aquel dia
ay vene ole el Hijo del Hombre.”

—San Lucas 21:34

Ahora, el maga mal deseo del naturaleza humano bien claro ya man gayot mira, y esos amo el imoralidad, el cuchinadas trabajo del maga gente hende casao, el porquerias, todo clase de accion de cuchinadas, el adoracion con el maga idolo, y el practica de hacer sahumero con el ayuda del maga demonio. Trabajo tamen del mal deseo del naturaleza humano si el gente ta odia, y ta pelea, ta man celos, ta rabia, ta man canalladas, y ta forma grupo para sigui el costumbre malo. Ta envidia con otros, ta man borracho hasta ta hace maga cosas malo, y ta hace pa maga cosas semejante con

esos. Todo esos el resulta del mal deseo lang del naturaleza humano del gente. Ta adverti yo con ustedes igual como ya adverti yo antes, que aquellos quien ta hace ese maga cosas malo, hende gayot sila ay hereda el Reino de Dios.

—Galacia 5:19-21

Porta kita enbuenamente como si fuera pirmi kita ta vivi na claridad del dia para todo el maga gente claro mira si cosa kita ta hace. No hace maga mal costumbre, como el maga tragon y el maga borrachon, y no man pelean pati no man celos entre uno y otro. No tamen hace cuhinadas y no comete adulterio ni comete

pecado entre maga gente hende pa casao. Pero deja con el Señor Jesucristo para ele amo ay queda el di ustedes defensa como el di uste-

des armas, y no dale lugar con el di ustedes mal naturaleza para . . . controla con ustedes.

—Roma 13:13, 14

EL SINCERIDAD HENDE BASTANTE

Ya contesta si Jesus con ele, “Necesita ustedes ama con Dios el di ustedes Señor con todo el di ustedes corazon y alma y con todo el di ustedes pensamiento. Este el mas importante mandamiento.”

—San Mateo 22:37, 38

“Buen Maestro, cosa man yo necesita hace para puede yo tene el vida eterna?” Y ya habla si Jesus con ele, “Porque man tu ta llama conmigo bueno? Nuay ni-

ngunos bueno, sino Dios lang. Sa-be gayot tu este maga mandamiento de Dios: no mata, no comete adulterio, no roba, no habla embusterias acerca de otros, no engaña, y necesita honra con el di tuyo tata y nana.” Despues ya contesta el joven con Jesus, “Maestro, todo ese maga mandamiento ta obedece gayot yo desde trece años pa lang yo.” Despues ya mira si Jesus con ese joven con cariño,

y ya habla, "Ta falta pa tu una cosa. Anda ya tu y vende todo el di tuyo bienes, y dale ese cen con el maga pobre, despues vene ya y sigui conmigo, y na ultimo ay tene tu riqueza na cielo." Cuando ese joven ya oi el maga palabra di Jesus, ya cambia gayot el ichura del di suyo cara y ya queda le bien triste. Despues ya sale le dayun, cay tiene le grande riqueza.

—San Marcos 10:17b-22

Este el cosa Dios ya habla, que ele amo el quien ya dale canaton vida eterna, y ese vida eterna ta sale con el di suyo Hijo. Si quien ta esta unido con el Hijo de Dios, tiene le vida eterna, y si quien hende ta esta unido con el Hijo, no puede le recibi ese vida. Ta escribi yo este carta con ustedes quien tiene fe con el Hijo de Dios para sabe gayot ustedes que tiene ustedes vida eterna.

—1 San Juan 5:11-13

NO QUEDA ENGAÑO

Mi maga anak, no deja que algunos ay engaña con ustedes cay sabe ustedes que si algunos ta

hace el cosas bueno na vista de Dios, ele justo igual como si Jesucristo justo. Si quien ta con-

tinua peca, sabe kita que el di suyo mal naturaleza ta sale con Satanas, cay si Satanas siempre ta peca desde el principio del mundo hasta ahora. —1 San Juan 3:7, 8a

No engaña con ustedes mismo de pensar que puede ustedes engaña con Dios. El vida dol el sementera, cay si cosa clase de semilla un gente ta sembra, el mismo clase lang tamen ele ay cosecha. —Galacia 6:7

Y ustedes mismo bien sabe que el maga gente malo hende ay queda ciudadano na Reino de Dios. No ustedes engaña con ustedes mismo acerca del maga accion que ta hace. Cay todo esos

quien ta practica imoralidad o esos hende pa casao quien ta comete pecado el uno con el otro, o esos quien ta adora con el maga idolo, o ta comete adulterio, o esos ta comete imoralidad entre hombre con hombre, o ta roba, o ta man avariento, o ta emborracha, o ta mulmura, o esos quien bandidos, todo ese maga clase de gente hende ay puede entra na Reino de Dios. —1 Corinto 6:9, 10

Si un gente de menos ta pensa que ele bien importante y bien alto gayot, ta engaña lang ele con ele mismo. —Galacia 6:3

Poreso no dale lugar con el maga gente para engaña con

ustedes por medio de embusterias, cay el rabia de Dios ta sigui con ese maga gente desobediente por causa de ese maga pecado di ila.

—Efeso 5:6

Y sigui hace si cosa el Sagrada Escritura de Dios ta manda hace en vez de oi que oi lang con ese. Cay si ta oi que oi lang, ustedes ta engaña lang con ustedes mismo.

—Santiago 1:22

EL PECADO TA LLEVA MUERTE

Este el que ya pasa. El pecado ya entra na mundo por medio de un persona si Adan, y por causa del di suyo pecado ya llega muerte, y el resulta de ese cada persona aqui na mundo ya hereda aquel muerte, cay todo el maga gente na mundo ya peca ya gayot.

—Roma 5:12

Despues, al quedar mas fuerte

el di ila maga mal deseo, el resulta amo ta peca ya sila, y por causa del maga pecado ay muri sila.

—Santiago 1:15

Si el pensamiento de un gente controlao del mal deseo, ay guinda le na infierno; pero si el pensamiento de un gente controlao del Espiritu Santo, el resulta ay tene le vida eterna y ay queda le con-

tento cay tiene le buen relacion con Dios. Si el gente controlao del di suyo mal naturaleza, enemigo gayot ele de Dios, cay hende ele ta sigui el ley de Dios y deporsi hende ele ay puede obedece con ese.

—Roma 8:6, 7

“Pero el maga cobardon y el maga gente nuay fe con Dios, y aquellos tiene manada de mal vicio y el maga criminal, y aquellos ta hace maga acto de imoralidad, y el maga hechicero, y el

maga gente ta adora con el maga idolo, y todo el maga embustero ay anda gayot na mar de fuego que ta arde con azufre. Amo este el segundo muerte.”

—Revelacion 21:8

Cosa man el ganancia di ustedes de hacer aquel maga cosas que ahora ta averguenza ya ustedes? El resulta de hacer aquel maga cosas amo como el muerte (quiere decir el separacion con Dios).

—Roma 6:21

SI CRISTO YA CONQUERA EL MUERTE

Tiene tamen le el naturaleza igual con Dios, y Dios ya dale mira canaton por medio del di suyo

gran poder que si Jesucristo el di suyo Hijo cay ya resucita le na lugar del maga muerto. —Roma 1:4

Ya grita le bien suena, "Lazaro, levanta! Sale alli!" Despues el quien estaba muerto ya sale afuera del cueva, y su maga mano y pies lucut pa con tela blanco, y su cara tamen envuelto pa de tela. Despues si Jesus ya habla con el maga gente cerca con ele, "Desata todo ese maga tela na su cuerpo para puede ya le camina volve."

—San Juan 11:43b, 44

Despues ya habla si Jesus, "Noy, ta manda yo contigo, levanta ya!" Entonces ya levanta dayun el muerto y ya principia conversa. —San Lucas 7:14b, 15a

"El di mio Padre ta ama gayot conmigo cay ta otorga yo muri

para con el maga carnero, y ay muri yo para despues ay puede yo levanta ole del muerte. Hende yo ay muri cay el maga gente lang ta desea mi muerte, sino por causa del di mio mismo querer ay deja yo con el maga gente mata conmigo. Tiene man yo el poder para muri y tiene tamen el poder para queda vivo ole, cay ese el cosa di mio Padre ya ordena hace conmigo." —San Juan 10:17, 18

"Yo el quien vivo siempre! Ya muri ya yo, pero ahora vivo yo siempre hasta para cuando, y tiene yo el llave del lugar donde ta esta todo el maga muerto."

—Revelacion 1:18

EL MAGA MANDAMIENTO DE DIOS

Ya habla le, “Maestro, donde el mas importante mandamiento del ley que Dios ya dale con Moises?” Ya contesta si Jesus con ele, “Necesita ustedes ama con Dios el di ustedes Señor con todo el di ustedes corazon y alma y con todo el di ustedes pensamiento. Este el mas importante mandamiento. Y este amo el segundo mandamiento, que necesita kita ama con el di aton maga vecinos como ta ama kita canaton mismo. Todo el maga mandamiento del ley que Dios ya dale con Moises, y todo el maga enseñanza del maga profeta incluido ya aqui con estos dos

mandamiento.”

—San Mateo 22:36-40

“Este amo el mas importante mandamiento, . . . ‘El Señor el di aton Dios, amo el unico Señor, y necesita ustedes ama con Dios el di ustedes Señor con todo el di ustedes corazon y alma, y con todo el di ustedes pensamiento y fuerza.’ El segundo mandamiento amo este, ‘Necesita kita ama con el di aton vecinos como ta ama kita canaton mismo.’ Nuay mas otro mandamiento mas importante que con este dos.”

—San Marcos 12:29b-31

“El amor tiene yo para con

ustedes igual con el amor que el di mio Padre Celestial tiene para conmigo. Continua ustedes esta siempre unido conmigo para ay experiencia el di mio amor. Si ay obedece ustedes el di mio maga mandamiento, ay continua ustedes experiencia el di mio amor, igual como yo ya obedece el maga mandamiento del di mio

Padre y ta experiencia yo el di suyo amor. Ta habla yo este antes de salir yo para ay tene ustedes alegria igual con el di mio, y para el di ustedes alegria ay queda completo. El encargo di mio para con ustedes amo este: ama con uno y otro igual como ta ama yo con ustedes.”

—San Juan 15:9-12

NO PUEDE TU ESCONDE CON DIOS

“Ele amo el Dios quien ya crea con el mundo y todo las cosas. Ele tamen el Señor del cielo y del tierra, y hende ele ta queda na maga edificio hecho lang de gente. Hende le ta depende con el maga

gente para sirvi con ele, y hende ele ta necesita ni nada, siendo ele pa gane mismo ta dale vida y resuello y todo las cosas con todo el maga gente. Dios ya crea un gente lang y ya sale con ese todo

el maga raza de gente para esta na entero mundo. Antes pa gayot ele mismo ya decidi si donde lugar sila ay esta y hasta cosa tiempo lang el di ila vida ay alcanza. Dios ya crea con el maga gente para puede sila aprende conoce con ele y puede tamen experiencia el di suyo presencia, cay hende man ele lejos canaton todo. Tiene quien ya habla que por medio del poder de Dios tiene kita vida y puede kita move y continua existi. Tiene del di aton maga poeta ya habla ya que maga anak ya kita de Dios.”

—Maga Trabajo 17:24-28

Y na otro parte del Sagrada Escritura ta habla tamen: “Dios

sabe que todo el maga pensamiento y opinion del maga sabiondo de aqui na mundo no sirvi nada, si acerca de Dios.” —1 Corinto 3:20

Poreso no ustedes critica ni con ningunos antes de llegar el Señor, cay ele lang gayot amo el quien ay hace claro si cosa clase de gente ba sila na di ila corazon, y el maga cosas que ya hace sila. Y despues de llegar aquel tiempo, cada uno di ila ay recibi si cosa aprobacion ba conviene sila tene con Dios.

—1 Corinto 4:5

Nuay ni un cosa creao ta puede queda escondido con Dios. Todo las cosas como bien abierto na su vista, y Dios bien claro gayot

mira. Y ay llega el tiempo que debe kita dale cuenta con ele de todo el maga cosas que ya hace kita.

—Hebreo 4:13

“Masquin cosa pa gayot bien

escondido ay queda gayot aclarao despues. Y todo el maga secreto que escondido ahora, ay puede sabe despues.”

—San Lucas 8:17

EL CASTIGO ETERNO DE AQUELLOS NUAY DIOS

“Despues, el Hijo del Hombre ay manda con el di suyo maga angeles na mundo para quita con todo el maga cosas que ta causa con el maga gente peca na di suyo Reino na mundo. Y ay quita tamen ele con todo el maga gente quien ta hace malo. Despues ay buta canila na fuego del infierno donde el maga gente ta llora que llora y ta man pagut el di ila

diente cay bien rabiao sila con Dios.”

—San Mateo 13:41, 42

Aquellos maga gente quien nuay el di ila nombre na libro de vida, ya acaba tamen canila buta na mar de fuego. —Revelacion 20:15

Pero por medio lang tamen de ese mismo palabra de Dios, ta guarda ya le con este cielo que ta puede kita mira y con este mundo, hasta ay destrosa le canila por

medio de fuego. Ay pasa ese al llegar si Jesucristo para juzga y castiga con el maga gente malo.

—2 San Pedro 3:7

Y ta habla pa si Jesus, “Todo

ese maga gente ay sufri castigo hasta para cuando, pero el maga gente justo na vista de Dios ay tene vida eterna.”

—San Mateo 25:46

EL JUSGAMIENTO QUE AY VENE

“Necesita sila arripinti cay Dios ya decidi ya un dia para ele ay juzga con el maga gente na entero mundo con su justicia por medio de un gente con quien ya nombra le.”

—Maga Trabajo 17:31a

Dios ya salva con Lot, por eso puede kita tene confianza que el Señor sabe salva con el maga gente bueno para escapa sila na di ila maga sufrimiento, y sabe

tamen kita que ele puede guarda el castigo para con el maga mal gente hasta el dia cuando si Jesucristo ay juzga canila.

—2 San Pedro 2:9

Dios ta hace fuerte el di suyo amor na di aton corazon para hende kita ay tene miedo del castigo de Dios al vener ele para juzga con todo el maga gente. Y tene kita confianza cay ta vivi

kita aqui na mundo conforme el vida di Jesucristo.

—1 San Juan 4:17

Cada uno del maga gente necesita muri una vez lang gayot, y despues del di suyo muerte, Dios ay jusga con ele.—Hebreo 9:27

Despues ya jusga con el maga muerto acorde con el cosa escribido alla na maga libro acerca del maga cosas que ya hace sila.

—Revelacion 20:12b

Cay un dia todo kita necesita

para gayot na presencia di Jesucristo, donde ay jusga le canaton. Y cada uno di aton ay recibi si cosa kita conviene recibi por el maga cosas ya hace kita durante el di aton vida na mundo, si bueno ba o malo. —2 Corinto 5:10

Aquel mismo dia cada uno di aton necesita dale cuenta con Dios acerca de todo el maga trabajo que ya hace kita, y necesita esplica el rason de ese.

—Roma 14:12

EL GRACIA DE JESUCRISTO

Pero estos dos hende igual, cay no puede kita compara el pecado

di Adan con el regalo que Dios ta dale. Mucho gente ya muri por

causa del pecado de ese primer gente, pero bien grande el favor de Dios, y bien grande tamen gayot el regalo que mucho gente ta puede recibi por medio del gran favor de ese otro gente si Jesucristo. —Roma 5:15

“Dios ta anda contra con el maga orgulloso, pero ta dale le gran favor con el maga gente nuay orgullo.” —1 San Pedro 5:5b

Ustedes ya llega ya man entiende el gran favor del di aton Señor Jesucristo, que masquin con todo el di suyo riqueza na cielo, con ele mismo ya hace bien pobre gayot aqui na mundo cuando ya vene le na cuerpo de un

gente por causa di ustedes. Y por causa del di suyo pobreza, ustedes ay queda rico gayot! —2 Corinto 8:9

Gracias a Dios por su Hijo, si Jesucristo, quien amo el di suyo regalo canaton! No puede kita en contra maga palabra para puede expresa o describi el valor de este regalo! —2 Corinto 9:15

Pero cuando omentao ya el di ila pecado, Dios ta dale mira que el di suyo gran favor mas grande. El pecado tiene poder para gana canaton cay el resulta del pecado ya lleva canaton muerte, pero por causa del gran favor de Dios ta puede le considera canaton como

si fuera nuay kita pecado. Y el resulta, ay tene kita vida eterna

por medio di Jesucristo el di aton Señor. —Roma 5:20b, 21

ARRIPINTIMIENTO

“Antes pa gayot Dios nuay hace caso con el ignorancia del maga gente, pero ahora ta ordena gayot ele con todo el maga gente de todo el maga lugar que debe sila arripinti del di ila maga maldad.” —Maga Trabajo 17:30

“Hende! Pero si hende ustedes ay arripinti del di ustedes pecado, igual tamen ay muri.”

—San Lucas 13:3

“Entonces arripinti ya el di ustedes maga pecado y sigui otra vez con Dios, y ay quita le el di

ustedes pecado, despues ay tene ustedes animo que ta sale con Dios el Señor. Y ay sinti libiano el di ustedes resuello.”

—Maga Trabajo 3:19

“Arripinti ya el di ustedes maga pecado, cay cerca ya llega el tiempo para Dios ay principia ya reina.” —San Mateo 3:2

“Ta habla yo con ustedes, aquellos na cielo igual tamen ay alegre si un pecador aqui na mundo ta arripinti del di suyo pecado, mas que con aquellos noventa y

nueve quien ta pensa nuay sila necesidad para arripinti.”

—San Lucas 15:7

“Cuando ya llega el hora para come, ya manda le con el di suyo ayudante anda habla con su maga invitao, ‘Vene ya ustedes, cay preparao ya el mesa.’ ”

—San Lucas 14:17

Cay Dios ta aproba aquel dolor que ta lleva cambio na pensamiento del gente, para desaleja le del maldad y para busca el di suyo salvacion. Pero si el gente hende-creyente de Dios tiene dolor na corazon, ese clase de dolor no puede salva con ele del muerte eterna.

—2 Corinto 7:10

EL PERDON DEL MAGA PECADO

“Y por medio del di suyo nombre necesita predica con todo el maga nacion que Dios ay perdona con todo aquellos quien ta arripinti el di ila maga pecado, y necesita principia predica ese aqui na Jerusalem.”

—San Lucas 24:47

Y ya habla si Jesus, “Entonces yo tamen hende ay sentencia con uste. Camina, y descansa ya de pecar.”

—San Juan 8:11b

Cuando si Jesus ya mira el cosa sila ta hace, sabe gayot ele que tiene sila fe con ele, y ya habla le

con el paralitico, “Ñor, perdonao ya el di tuyo pecado.”

—San Marcos 2:5

“Oi ustedes! Ta para yo na puerta di ustedes y ta saluda yo. Si quien ay oi conmigo saluda y ay abri el puerta, ay entra yo na su

casa y ay come came dos junto.”

—Revelacion 3:20

“Si ta perdona ustedes con el maga gente quien ta hace malo con ustedes, el di ustedes Padre Celestial ay perdona tamen con ustedes.”

—San Mateo 6:14

EL SEPARACION NA COSAS DEL MUNDO

Ta escribi yo ansina cay Dios ya dale ya mira el di suyo gran favor para dale salvacion con todo el maga gente. Y por medio de este salvacion de Dios ta aprende gane kita abandona el vida que nuay Dios, y el maga mal deseo tamen. En vez de vivir ansina, debe kita vivi controlao del sentido comun

y debe queda bien honesto y bueno asegun el orden de Dios, y vivi con devocion para con Dios y hende con pecado. —Tito 2:11, 12

Pirmi pensa ustedes acerca del maga cosas na cielo, y hende lang del maga cosas taquí na mundo.

—Colosas 3:2

No tene parte na maga trabajo

malo que ta hace el maga gente quien ta vivi pa na oscuridad, cay ese maga trabajo nuay buen resulta, sino malo. En vez de seguir ese, demuestra siempre el cosa bueno na di ustedes vida, y ansina ay dale mira que no vale nada el di ila maga mal costum-bre. —Efeso 5:11

No quere con el maga cosas de este mundo, ni quere gayot sigui

el maga cosas malo na mundo, cay no puede mas kita ama con Dios y el mismo tiempo quiere tamen kita con el maga cosas del mundo. Este maga cosas del mundo como el mal deseo del cuerpo, y el deseo para tene todo el maga cosas que ta mira kita, y el orgullo de tener riqueza, hende ta sale con el Dios Padre sino ta sale lang aqui na mundo. —1 San Juan 2:15, 16

EL NUEVO NACIMIENTO

“El intencion del ladron si ta entra na turil amo para roba, mata, y destrosa, pero el di mio intencion cuando ya vene yo aqui na mundo amo para dale vida con el

maga gente, y aquel vida bien completo y nuay fin.”

—San Juan 10:10

Entonces, al quedar un gente creyente, unido ya le con Jesu-

cristo y igual como nuevo pa lang ya crea el di suyo corazon. Todo el maga cosas daan na su vida dol ya desaparece ya, y todo ya queda ya nuevo na di suyo pensamiento.

—2 Corinto 5:17

Ya contesta si Jesus con Nicodemo, “Ta habla gayot yo claro, si el gente hende ay nace otra vez, hende le nunca ay puede queda el ciudadano del Reino de Dios.”

—San Juan 3:3

Pero ahora perdonao y limpio ya ustedes del pecado, y Dios ya separa ya con ustedes del maga mal costumbre del mundo para queda ustedes di suyo lang, por

medio di Jesucristo. Y ansina tamen Dios ta considera con ustedes como si fuera nuay pecado por medio del Señor Jesucristo, y por medio del Espiritu Santo del di aton Dios.

—1 Corinto 6:11b

Cay ya queda ustedes como si fuera ya nace ya otra vez. Nuay ustedes tene ese nuevo vida por medio del di ustedes maga tata aqui na mundo quien ay acaba lang muri, sino por medio de Dios quien nunca ay muri. Y tiene ustedes ese nuevo vida por medio del Buen Noticia de Dios, que ta dale vida y ta permanece hasta para cuando. —1 San Pedro 1:23

MUERTO NA PECADO—VIVO EN CRISTO

Antes como muerto pa ustedes para na vista de Dios por causa del di ustedes maga desobediencia y maga pecado. . . . Y por causa del di aton union con Jesucristo, Dios ya hace canaton resucita junto con ele, y ya dale tamen le canaton lugar junto con Jesucristo alla na cielo. —Efeso 2:1 y 6

Si Jesucristo mismo ya sufri el castigo para el di aton maga pecado cuando ya muri le na cruz, para queda ya kita separao del vida de pecado y para vivi ya kita un vida bueno. Por medio de ese maga herida di Jesucristo na cruz,

ustedes ya queda ya bueno, para puede vivi enbuenamente.

—1 San Pedro 2:24

Na, si Jesucristo ya resucita ya, poneso, ustedes dol ya resucita ya tamen junto con ele. Entonces, desea gayot para obtene aquel maga cosas na cielo donde ahora si Jesucristo sentao na lao derecha de Dios, onde tiene le poder para reina. Pirmi pensa ustedes acerca del maga cosas na cielo, y hende lang del maga cosas taqui na mundo. Cay dol muerto ya el di ustedes maga mal naturaleza de antes, y el di ustedes nuevo vida talla ya na cargo de Dios, por

medio di Jesucristo. —Colosas 3:1-3

Y el verdadero creyente di Jesucristo como ya mata con el di suyo mal naturaleza humano, junto con todo el maga mal deseo de ese. El Espiritu Santo ya dale canaton vida espiritual, por eso necesita kita permiti con ele guia tamen el di aton maga vida aqui na mundo. —Galacia 5:24, 25

No puede mas kita continua

peca, cay el di aton mal naturaleza ya muri ya cuando ya confia kita con Jesucristo y ahora no puede mas controla canaton el pecado. . . . De mismo manera necesita ustedes considera el di ustedes mismo maga cuerpo como muerto, y ahora tiene ya ustedes un nuevo vida para puede ustedes dale alabanza y honor con Dios por causa del di ustedes union con Jesucristo. —Roma 6:2 y 11

VIDA ETERNA

Si el gente ta sembra maga accion que ta satisface con el di suyo maga mal deseo, ay cosecha lang ele muerte. Si el gente ta sembra

maga accion guiao por el Espiritu Santo, ay cosecha le el vida hasta para cuando que ta dale el Espiritu Santo. —Galacia 6:8

De igual manera si Moises ya pone el culebra de bronze arriba del poste alla na desierto, ansina tamen necesita pone arriba del poste con el Hijo del Hombre, para si quien ay tene fe con ele ay puede tene vida eterna.

—San Juan 3:14, 15

“El vida eterna puede yo esplica como ansina, que necesita sila conoce con uste quien el unico verdadero Dios, pati con Jesucristo, con quien uste ya manda aqui na mundo.”

—San Juan 17:3

Ahora, si quien ta cree con el Hijo de Dios y ta obedece con ele, ay tene gayot vida eterna. Pero si quien ta desobedece con el Hijo de

Dios hende nunca ay tene vida eterna, sino ay vivi le bajo del rabia de Dios hasta para cuando.

—San Juan 3:36

Sabe kita si ta comete kita pecado el pago de ese amo el muerte, pero el regalo que Dios ta dale canaton amo el vida eterna si unido kita con Jesucristo el di aton Señor.

—Roma 6:23

“Ta habla gayot yo claro, si quien ta oi el di mio maga palabra y tiene fe con el quien ya manda conmigo aqui, ele tiene vida eterna junto con Dios. Hende na ay pasa con ele el condenacion de Dios, sino ya sale le na lugar del

muerte, que quiere decir separao con Dios, y ahora tiene ya le un nu-

evo vida que ay permanece hasta para cuando.” —San Juan 5:24

ASEGURANSA DEL SALVACION

El Espiritu Santo ta asegura con el di aton maga corazon que kita maga anak ya de Dios.

—Roma 8:16

Si quien ta esta unido con el Hijo de Dios, tiene le vida eterna, y si quien hende ta esta unido con el Hijo, no puede le recibi ese vida. Ta escribi yo este carta con ustedes quien tiene fe con el Hijo de Dios para sabe gayot ustedes que tiene ustedes vida eterna.

—1 San Juan 5:12, 13

“Si quien ta entende y ta

obedece el di mio maga mandamiento, ele amo el ta ama conmigo, y si quien ta ama conmigo, el di mio Padre na cielo ta ama con ele, y yo tamen ay ama con ele y ay hace yo claro con ele acerca di mio mismo persona.”

—San Juan 14:21

Si ta obedece kita el maga mandamiento de Dios ay puede asegura que conoce gayot kita con ele.

—1 San Juan 2:3

Y ahora gayot este: paquemodo man kita puede asegura que unido

kita con Dios, y ele unido canaton? Sabe kita ese cay ya dale le canaton el di suyo Espiritu Santo.

—1 San Juan 4:13

Dios ya manda con el Espiritu del di suyo Hijo Jesucristo na di

aton maga corazon, para dale prueba que deverasan kita el maga anak ya de Dios. Y por medio de ese Espiritu puede kita llama con Dios, “Di mio Padre!”

—Galacia 4:6

EL ESTADA DE CRISTO NA DI ATON VIDA TA DALE ALEGRIA

“Ahora mas cerca ya gayot el hora para volve ya yo alli con uste, pero ta habla yo todo este mientras taqui pa yo na mundo, para tene sila el alegria bien completo igual con el di mio.”

—San Juan 17:13

“Al birar yo otra vez ay queda ustedes alegre y nuay ningunos

quien ay puede quita ese alegria con ustedes.” —San Juan 16:22b

El maga cosas prohibido acerca de comida y de tomada hende el mas importante cosas para canaton maga miembro del Reino de Dios. El mas importante amo gayot si ay queda kita justo na vista de Dios y si tiene kita buen

relacion con Dios pati con el maga gente, y mas importante tamen si tiene kita el alegria que ta sale con el Espiritu Santo. —Roma 14:17

“Hasta ahora nuay pa gayot ustedes pidi ni nada na mi nombre, pero ahora pidi con Dios y ay recibi gayot ustedes, para el di ustedes alegria ay queda bien completo.” —San Juan 16:24

Por causa del di mio fe con Jesucristo, como si fuera yo crucificao junto con ele na cruz, y ahora hende na yo amo el quien ta vivi pa, sino si Jesucristo ya ta vivi adentro del di mio corazon. Ele ya ama conmigo, y ya muri para conmigo, y ahora ta vivi pa

yo aqui na mundo por medio lang de fe con ele, el Hijo de Dios.

—Galacia 2:20

“Ta habla yo este antes de salir yo para ay tene ustedes alegria igual con el di mio, y para el di ustedes alegria ay queda completo.” —San Juan 15:11

Ta habla yo aqui que masquin ya oi el maga gente el ley di Moises, hende este husto para Dios ay considera canila como si fuera nuay sila pecado. Sino el maga gente quien ta obedece el cosa Dios ta manda na su ley, ele ay considera canila como si fuera nuay sila pecado. —Roma 2:13

NECESITA OBEDECE CON EL SEÑOR

Sabe kita si ay rindi kita el di aton maga cuerpo con algunos como maga esclavo, ay obedece gayot kita con ese cay ele el di aton amo. Ansina si ay rindi kita el di aton maga cuerpo para peca, el resulta de ese amo el muerte. Pero si ay escoje kita sigui con Dios, ay obedece kita con ele y ay considera le canaton como si fuera nuay kita pecado. —Roma 6:16

Ele tamen ay dale descanso con ustedes quien ta sufri, y el mismo tamen ay dale le canamon. Ay hace le este al llegar el Señor Jesucristo del cielo, junto con su maga angeles poderoso, entre na clari-

dad del fuego. Y ay castiga le canila quien hende ta conoce con Dios y quien hende ta obedece el Buen Noticia acerca del di aton Señor Jesucristo. Ay sufri sila el castigo hasta para cuando, y ay pone le canila afuera del presencia del Señor y del di suyo gloria y poder. —2 Tesalonica 1:7-9

Y por causa del di suyo obediencia, Dios ya puede hace con ele preparao completamente para queda le el persona con quien ta sale el salvacion eterna, y para todo el maga gente quien ta obedece con ele ay puede tene ese salvacion. —Hebreo 5:9

Ahora, ta llega ya el tiempo que Dios ta principia proba con el maga gente por medio del maga dificultad, y ta vene anay ese probacion con el maga creyente de Dios, para diciplina canila. Aver,

si ta principia ese diciplina canaton maga creyente, cosa man gaja el castigo para con aquellos quien hende ta obedece con el Buen Noticia de Dios?

—1 San Pedro 4:17

NECESITA CONFESA CON CRISTO

Y todo sila ay admiti que si Jesucristo amo el Señor, para dale honor con el Dios Padre.

—Filipos 2:11

“Entonces si quien ay habla na publico que ele ta sigui conmigo, yo tamen ay conoce con ele na presencia del di mio Padre na cielo. Pero si quien ay habla na publico que ele no conoce con-

migo, yo tamen ay habla que yo no conoce con ele na presencia del di mio Padre na cielo.”

—San Mateo 10:32, 33

Si ta declara ustedes con el maga gente que si Jesucristo amo el Señor, y na di ustedes corazon ta cree que Dios ya hace con ele levanta na lugar del maga muerto, entonces Dios ay salva con uste-

des. Cay Dios ay considera lang canaton como si fuera nuay kita pecado si tiene kita fe na di aton corazon, y Dios ay salva canaton si ta habla kita con otros que tiene kita fe con Jesucristo.

—Roma 10:9, 10

Si algunos ta nega que si Jesus hende el Hijo de Dios, el Padre Celestial hende ta vivi na su corazon, pero si quien ta admiti que

si Jesus amo el Hijo de Dios, ele ay puede esta unido con el Padre Celestial.

—1 San Juan 2:23

“Aquellos quien tiene huya sigui conmigo y con el di mio enseñanza, el Hijo del Hombre hende tamen canila ay conoce si ay vene le envuelto con el di suyo resplandor y con el resplandor del Padre Celestial y del maga angeles.”

—San Lucas 9:26

SI SATANAS—BIEN CONTRARIO DI ATON

Tene siempre pensamiento claro y esta alerta. Cay si Satanas, el di ustedes enemigo, ta anda gruñiendo dol un leon bien con hambre quien ta busca masquin con quien

para come entero-entero.

—1 San Pedro 5:8

“ ‘Ay causa tu canila realiza el di ila mismo situacion para deja sila el vida de oscuridad y ay vivi

na claridad de Dios. Despues ay queda sila controlao con el poder de Dios en vez de controlao con el poder di Satanás, y ay queda sila perdonao del pecado .’ ”

—Maga Trabajo 26:18a

Despues ya lleva el Espiritu Santo con Jesus na desierto donde si Satanás ta precura era manda peca con ele. Y ya contesta si Jesus con ele, “Satanás, sale aqui, cay ya escribi na Sagrada Escritura de Dios, ‘Adora lang con Dios el Señor, y con ele lang sirvi.’ ”

Despues de ese si Satanás ya sale dayun y husto lang ya llega el maga angeles con Jesus para cuida gayot con ele.

—San Mateo 4:1 y 10, 11

Por ultimo, man fuerte ustedes por medio del union con el Señor y por medio del di suyo gran poder. Proteje con ustedes mismo con todo el proteccion que Dios ta dale, para puede ustedes para duro contra con el maga engaño di Satanás.

—Efeso 6:10, 11

VICTORIA CONTRA CON SATANAS

Siendo el maga gente con quien ta llama le el di suyo maga anak,

tiene carne y sangre, entonces si Jesucristo ya queda tamen carne

humano igual canila, y ya muri le na cruz para puede destrosa con Satanás quien tiene el poder para controla con el muerte.

—Hebreo 2:14

Si quien ta continua peca, sabe kita que el di suyo mal naturaleza ta sale con Satanás, cay si Satanás siempre ta peca desde el principio del mundo hasta ahora. El rason si porque el Hijo de Dios ya vene na mundo amo para destrosa todo el maga trabajo di Satanás.

—1 San Juan 3:8

Masquin todo'l dia tiene kita problema o trambulicacion o ta persigui el maga gente canaton, y masquin nuay kita que come o

bien pobre gayot kita, y masquin ay llega el peligro canaton o ta acerca ya el muerte, nuay nada puede separa canaton del amor di Jesucristo. Pero masquin ta experiencia kita todo clase de tormento na di aton vida, ya queda kita victorioso por causa del amor di Jesucristo.

—Roma 8:35 y 37

Poreso man bueno y obedece con Dios. Investi con Satanás, y ay desaleja le con ustedes. Atraca con Dios, y ele tamen ay atraca con ustedes.

—Santiago 4:7, 8a

Despues ese gente enemigo de Dios ay puede abuya. Pero ay muri le por medio del resuello del

Señor Jesucristo, y ay queda le destrosao por el resplandor del llegada del Señor Jesucristo. Pero ese gente enemigo de Dios ay tene todo el poder di Satanás al llegar

le aqui na mundo, y ay hace le maga milagro y maga señal para engaña y maga cosas para manda asusta con el maga gente.

—2 Tesalonica 2:8, 9

AMOR, PRUEBA DE SER DICIPULO

“Si ta ama ustedes conmigo, ay obedece gayot ustedes todo el di mio maga mandamiento.”

—San Juan 14:15

Pero el maga buen cosas na vida del gente que ta manda el Espiritu Santo amo el amor, alegría, paz, paciencia, el buen deseo para ayuda con todo corazon, el deseo para dale provecho con otros, fidelidad na todo accion y pala-

bra, el corazon amable, y siempre controlao el maga accion.

—Galacia 5:22, 23a

“Y si tiene ustedes ese amor con uno y otro, todo el maga gente ay sabe que ustedes deverasan el maga dicipulo di mio.”

—San Juan 13:35

Si algunos ta habla que ta ama le con Dios pero ta odia le con su hermano creyente, bien embust-

ero gayot ele, cay si hende gane le ta ama con su hermano quien talli ya lang na di suyo presencia, no puede gayot ele ama con Dios, con quien nuay le nunca mira.

—1 San Juan 4:20

Sabe kita que ya sale ya kita na

muerte, quiere decir el vida de pecado, y ahora tiene ya kita el vida eterna, y sabe ya kita ese, cay ta ama kita con el di aton maga hermano creyente. Si quien hende ta ama con otros, como si fuera muerto ya le.

—1 San Juan 3:14

EL RESURECCION DE JESUCRISTO

“Came maga apostoles ya puede mira el maga cosas que ya hace le na lugar del maga Judio y na ciudad de Jerusalem. Ya mata con ele cuando ya clava con ele na cruz, pero cuando tres dias ya le de muerto, Dios ya hace con ele resucita, y ya manda con ele

aparece con el maga gente. Hende todo el maga gente ya puede mira con ele, sino came lang con quien Dios antes pa ya escoje ya para puede mira con ele. Y despues de resucitar ele, ya come y ya toma came junto con ele.”

—Maga Trabajo 10:39-41

Despues de un semana, el maga dicipulo di Jesus ya ajunta otra vez na casa, y este vez si Tomas talla junto canila. El maga puerta trancao ya tamen, pero ya llega si Jesus y ya para le junto canila, despues ya habla, "El paz de Dios esta gayot con ustedes." Despues ya man atubang ele con Tomas hablando, "Tomas, pone tu dedo aqui, y mira tu con el di mio dos mano. Ahora agarra tu con el

herida na di mio costao. No mas duda, sino cree gayot tu conmigo!" Ya contesta si Tomas con ele, "Uste gane mi Señor y mi Dios!" —San Juan 20:26-28

Dios ya entrega con ele para muri por causa del di aton maga pecado, y despues ya hace con ele resucita para Dios ay considera canaton como si fuera nuay pecado. —Roma 4:25

EL GLORIOSO ESPERANZA DEL RESURECCION

"Ta habla gayot yo claro otra vez que ay llega el tiempo y masquin ahora ya llega ya gane ese

tiempo, que el maga gente quien como si fuera muerto ya (cay separao con Dios) ay puede oi y

obedece el voz del Hijo de Dios. Y aquellos quien ta oi y obedece con ele ay tene vida eterna. No ustedes espanta por causa del di mio maga palabra, cay ay llega el tiempo cuando todo aquellos maga muerto talla ya na di ila maga sepultura ay oi el voz del Hijo del Hombre, y ay sale sila na di ila maga sepultura. Aquellos quien ya hace bueno ay resucita para recibi vida eterna, pero aquellos quien ya hace malo ay resucita para recibi el sentencia para na infierno.”

—San Juan 5:25 y 28, 29

Conforme ya levanta si Jesucristo del muerte por medio del

grande poder del di suyo Padre, kita tamen ay tene un nuevo vida junto con ele. Si ya man junto kita con ele cuando ya muri le, ansina tamen unido ya kita con ele cuando ya resucita le. —Roma 6:4b, 5

Sabe kita que el di aton maga cuerpo ay muri siempre por causa del pecado, pero si ta controla si Cristo canaton el Espiritu Santo ta dale pa siempre canaton vida eterna cay Dios ta considera canaton como si fuera nuay kita pecado. Si ta vivi na di aton corazon el Espiritu de Dios quien ya hace levanta con Jesucristo del muerte, entonces aquel mismo Dios ay dale vida con el di aton

maga cuerpo por medio del
Espiritu Santo quien ta vivi na di

aton maga corazon.

—Roma 8:10, 11

VIDA SAGRAO PARA CON DIOS

“Que ay acudi le canaton na mano de todo el di aton maga enemigo para sirvi kita con ele sin miedo. Necesita kita rindi el di aton corazon con Dios, y hace tamen cosas bueno na su vista na entero vida di aton.”

—San Lucas 1:74, 75

Entonces, ustedes maga amigo de Corinto, tiene kita todo ese maga promesa de Dios. Poreso ahora hace kita limpio todo el maga pecado que ta encuchina el di aton cuerpo y alma, para queda

kita completamente separao na pecado para sirvi con Dios, y para vivi kita con susto de pecar y devocion con Dios. —2 Corinto 7:1

Ansina tamen con el maga gente creyente. Si algunos ay desaleja de todo el mal para hace limpio el di suyo corazon y vida, su amo ay usa con ele para hace trabajo especial. Cay entonces ele bien usable para puede el amo manda con ele hace todo trabajo bueno. —2 Timoteo 2:21

Sino vivi ustedes ahora con-

forme ta vivi Dios mismo, quien ya escoje con ustedes. Ele bien perfecto y sin pecado, y ansina tamen debe ustedes queda.

—1 San Pedro 1:15

Poreso si Jesucristo ya sufri tamen afuera del ciudad para limpia le con el maga gente del di ila maga pecado por medio del di suyo sangre.

—Hebreo 13:12

Dios ya escoje canaton para queda el di suyo maga gente por medio del union con Jesucristo, para queda ya kita devoto con ele, separao del pecado, y sin culpa na di suyo vista. Ele ya escoje canaton desde antes pa del creacion del mundo. Despues de abandonar

con el mal naturaleza, necesita ustedes pone el nuevo naturaleza como si fuera ese un ropa. Ese nuevo naturaleza creao por Dios y igual con el di suyo mismo naturaleza, para ay tene ustedes un vida de maga costumbre bueno y nuay pecado, un vida devoto para con Dios.

—Efeso 1:4; 4:24

Precura gayot tu hace todo el que puede para gana tu el aprobacion de Dios, como un buen servidor quien hende ta tene huya na trabajo ta hace le, cay hende tu ta equivoca na enseñada del verdadero mensaje de Dios.

—2 Timoteo 2:15

Pero si ta confesa kita el di aton

maga pecado con Dios ay perdona le canaton, cay ele bien fiel y justo. Y ay limpia tamen le todo el di aton maga maldad.—1 San Juan 1:9

Entonces, paquemodo man debe

kita vivi para hende ay queda incluido con el maga gente castigao? No debe kita peca, sino tene vida de devocion con Dios, separao para con ele. —2 San Pedro 3:11

MAGA GENTE LLENO DEL ESPIRITU DE DIOS

“Ustedes maga tata, masquin pecador, sabe gayot quemodo dale cosas bueno con el di ustedes maga anak, poreso puede gayot ustedes asegura que el Padre Celestial ay dale gayot el Espiritu Santo con aquellos quien ta pidi con ele.” —San Lucas 11:13

Cuando ya acaba ya sila reza, ya tembla el casa donde sila ya man junto, despues ya queda sila con-

trolao del Espiritu Santo y ta habla sila siempre el mensaje de Dios sin miedo.—Maga Trabajo 4:31

Pero si Esteban controlao del Espiritu Santo, y ya pija le na cielo y ya mira le el resplandor de Dios, y ya mira tamen le con Jesucristo talla parao na lao derecha de Dios. —Maga Trabajo 7:55

Pero sabe kita si el Espiritu de

Dios ta controla ya canaton hende na kita ta sigui el mal deseo que ta sale na di aton mal naturaleza, sino ta sigui kita si cosa el Espiritu de Dios ta habla canaton. Si quien nuay el Espiritu di Cristo hende deverasan el siguidor di suyo.

—Roma 8:9

“Pero cuando el Espiritu Santo

ay llega con ustedes, ay recibi ustedes su poder y ay queda ustedes mi maga mensajero para predica acerca di mio con el maga gente.”

—Maga Trabajo 1:8a

El maga siguidores del Señor na Antioquia ya queda bien alegre y bien controlao gayot del Espiritu Santo.

—Maga Trabajo 13:52

MAGA BONITO PROMESAS PARA CON EL MAGA CRISTIANOS

“Pero mas importante si ay prepara gayot ustedes por el venida del Dios para reina. Y hace tamen ustedes el cosa justo na su vista, despues ele ay dale con ustedes ese maga necesidad de

todo el dia.”

—San Mateo 6:33

Y ya habla si Jesus con ele, “Porque man ta habla uste, si puede yo? Si el gente ta cree con Dios, todo'l cosas puede le hace.”

—San Marcos 9:23

“No olvida que yo junto con ustedes siempre hasta para cuando.”
—San Mateo 28:20b

Maga estimao amigos, no estraña con el maga problema dificil que ta llega con ustedes, como si fuera una cosa extraordinario que ta pasa con ustedes. Pero ustedes debe tene alegría cay tiene ustedes parte na maga sufrimiento di

Jesucristo, para puede tamen tene alegría al mirar ustedes el resplandor del di suyo segundo venida.

—1 San Pedro 4:12, 13

“Ay limpia le el lagrimas del di ila maga ojos, y nuay mas muerte ni tristeza, llantos ni dolor, cay todo el maga cosas de antes pasao ya.”
—Revelacion 21:4

MAGA PROMESAS CON AQUELLOS QUIEN YA CAE NA TENTACION

Ahora ta puede le ayuda con el maga gente quien ta experiencia tentacion, cay ele mismo ya sufri tamen cuando si Satanás ya tenta con ele.
—Hebreo 2:18

Dios con quien ta sale el di aton paz, hende na tarda ay destrosa ya el poder di Satanás para ay queda le bajo mando di ustedes.
—Roma 16:20

Alegre el gente quien ta aguanta con paciencia el maga problema na vida. Cay si el fe di suyo ta puede aguanta con ese maga problema, ay recibi le el vida eterna que Dios ya promete con el maga gente quien ta ama con ele.

—Santiago 1:12

Sabe kita que Dios ta trabaja junto con aquellos quien ta ama con ele, para todo el maga cosas ta pasa canila ay causa le tene buen resulta.

—Roma 8:28

Debe ustedes entende que todo ese maga tentacion di ustedes igual como de antes pa gayot, amo ya man ese el clase de problema ya pasa con todo el maga otro gente. Pero Dios fiel, y ele hende ya lang ay permiti con ustedes queda tentao mas que puede ustedes aguanta. Si ta sufri man ustedes tentacion, ay dale man ele con ustedes un escape para puede ustedes aguanta con paciencia.

—1 Corinto 10:13

MAGA PROMESAS CON AQUELLOS QUIEN YA GANA CONEL TENTACION

“Si quien ay sale victorioso contra el pecado, ay queda sila como

maga poste na templo del di mio Dios, y ay esta sila alla hasta para

cuando. Y ay escribi yo alli canila el nombre del di mio Dios y el nombre del ciudad de Dios, el nuevo Jerusalem que ay sale con el di mio Dios na cielo. Y ay escribi tamen yo alli canila el di mio nuevo nombre.”

—Revelacion 3:12

“Si quien ay sale victorioso contra con el malo, ay dale yo visti blanco y hende yo nunca ay borra el di ila nombre alla na libro de vida. Y hende gayot yo ay nega el di ila maga nombre na presencia del di mio Padre ni del di suyo maga angeles.” —Revelacion 3:5

“Si quien ay sale victorioso contra el pecado, ay dale yo canila el

derecho para senta junto conmigo na mi trono y ay reina junto conmigo, igual como ya gana yo el victoria y ahora ta senta yo na lao del di mio Padre Celestial na su trono.”

—Revelacion 3:21

“Si quien ay sale victorioso ay hereda este maga cosas, y ay queda yo el di suyo Dios y ele ay queda el di mio anak.”

—Revelacion 21:7

Si quien ay sale victorioso contra el pecado, ay dale yo el derecho para come el fruta del pono'y palo que ta dale vida eterna que ta crici na jardin de Dios.”

—Revelacion 2:7b

EL DIOS TA CONVERSA CANATON ACERCA DEL SEPARACION DEL MAGA MARIDABLE

Y quiere tamen yo habla con el maga creyente casao, que el mujer no debe deja con su marido. Pero si deja le, necesita le esta solo y no gayot tene otro marido, o necesita le bira ya lang otra vez con su marido. Y el marido no debe divorcia con su mujer. Este hende lang el di mio maga reglamento, sino del Señor gayot. —1 Corinto 7:10, 11

Ay dale yo con ustedes un ejemplo del mujer casao. Por causa del casamiento civil, amarrao gayot ele con su marido hasta cuando le vivo, pero si el marido ay muri, el di suyo mujer libre ya

de aquel contrato de casamiento que ta amarra con ele con su marido. Entonces si este mujer ay vivi na lao de otro hombre mientras vivo pa su marido, el maga gente ay llama con ele querida de aquel hombre. Pero si ay muri ya su marido, libre ya le y masquin ay casa le con otro hombre hende le ta man contra na ley civil y hende gayot le ta comete adulterio. —Roma 7:2, 3

“El gente quien ta deja con su mujer para casa con otro, ta comete adulterio, y si quien ay casa con el mujer quien ya deja con el

di suyo marido, igual tamen ese hombre ta comete adulterio.”

—San Lucas 16:18

“Pero ta habla yo con ustedes, si por ejemplo un gente ay separa con su mujer quien nuay culpa, y despues de separar el mujer ay

casa con otro, ansina ay comete le adulterio. Pero el primer marido amo el tiene culpa cay ay causa le con su mujer para peca. Y el gente quien ay casa con ese mujer ay comete tamen adulterio.”

—San Mateo 5:32

EL SEGUNDA VENIDA DE CRISTO

“Ay volve ya yo y despues de preparar yo el maga lugar para di ustedes, ay bira yo ole aqui y ay saca yo con ustedes para puede ustedes tamen esta junto conmigo.”

—San Juan 14:3

“Despues ay aparece el Señal del Hijo del Hombre na cielo, y todo el maga clase de herencia del

maga gente aqui na mundo ay llora de tristesa, y ay mira sila con el Hijo del Hombre quien ay vene envuelto de celaje con grande poder y resplandor.”

—San Mateo 24:30

“Cay el Hijo del Hombre ay llega derrepente lang igual de bien pronto como el claridad del kirlat

que ta man siplat desde na este hasta na oeste.” —San Mateo 24:27

Ansina tamen necesita ustedes tene mucho paciencia, y tene animo, cay cerca ya el llegada del Señor. —Santiago 5:8

Despues el dos gente ya habla canila, “Ustedes maga gente de Galilea, porque pa man ta mira na cielo? Aquel si Jesus con quien Dios ya quita aqui junto con ustedes y ya lleva na cielo, ay vene otra vez de igual manera como ya mira ustedes con ele anda na cielo.” —Maga Trabajo 1:11

Mi maga estimao amigo, este mismo tiempo maga anak ya kita de Dios, pero no puede pa sabe

gayot si cosa ba kita ay queda al llegar si Jesucristo otra vez. Pero aseguro ay sabe gayot kita que al birar le otra vez ay queda kita igual con ele, cay ay puede gayot kita mira enbuenamente con el di suyo ichura, y ay sabe tamen kita el di suyo verdadero naturaleza. Todo el maga gente quien tiene este esperanza de mirar con Cristo necesita continua evita comete pecado para queda igual con Jesucristo quien nuay pecado.

—1 San Juan 3:2, 3

“Poreso ustedes tamen esta preparao y alisto, cay derrepente lang ay vene ole el Hijo del Hombre.” —San Lucas 12:40

EL PALABRA DE DIOS

Cay nuay mensaje de Dios ya llega con el maga mensajero cay sila lang quiere lleva aquel mensaje, sino el Espiritu Santo amo el quien ya influencia canila para habla sila el mensaje que Dios ya dale canila. —2 San Pedro 1:21

El maga palabra de Dios bien poderoso y como si fuera vivo gayot. Puede kita compara el di suyo maga palabra con el puñal bien agudo que puede lansia masquin sosa. Ansina el maga palabra de Dios puede penetra hasta na ultimo sentido del di aton cuerpo. Este un ejemplo del poder del

maga palabra de Dios. Y el maga palabra de Dios ta entra tamen na di aton corazon cay Dios puede sabe todo el di aton maga pensamiento y si cosa el maga intencion na di aton maga corazon.

—Hebreo 4:12

Dios ya dale canaton el completo Sagrada Escritura, y puede kita usa ese para enseña, y para proba que hende amo el maga enseñanza falso, y para corriji el mal conducta, y para enseña acerca del vida bueno que debe kita vivi conforme el maga orden de Dios. —2 Timoteo 3:16

REZA Y PERDONA

No copia el di ila manera de rezo, cay el di ustedes Padre Celestial sabe ya gayot el cosa di ustedes maga necesidad antes de pidir ustedes. Entonces, reza ustedes ansina: 'Di amon Padre na cielo, ta dale came honor con el di uste nombre sagrao, y ta roga came que uste ay vene para reina canamon. Ojala que todo el maga gente ay hace el di uste querer aqui na mundo igual como todo aquellos ta hace na cielo. Todo el dia, dale canamon el comida ta necesita came, y perdona el di amon maga pecado, como ta perdona tamen came con todo

quien ta hace malo canamon. Y no deja canamon cae na tentacion, y protege canamon na poder di Satanas. Uste el Rey bien poderoso con quien ta dale came alabanza y honor hasta para cuando. Amen.'” Despues de enseñar reza si Jesus, continua le habla, “Si ta perdona ustedes con el maga gente quien ta hace malo con ustedes, el di ustedes Padre Celestial ay perdona tamen con ustedes. Pero si hende ustedes ta perdona con el maga culpa del maga otro gente, Dios tamen hende ay perdona el di ustedes maga culpa.” —San Mateo 6:8-15

Published in numerous languages by World Missionary Press as God supplies funds in answer to prayer. If you would like more copies for careful distribution, write in English to:

World Missionary Press, Inc.
P.O. Box 120
New Paris, IN 46553-0120